



09737

賦

黃河賦

吾觀黃河之渾渾兮乃元氣之萃烝濬洪源於西極
兮注天派於滄瀛貫后土之厓博兮沓玄溝之晶明
過積石而左轉兮龍門呀而峻傾薄太華而東驚兮
撼砥柱之崢嶸入大陸而北徙兮迷不辨夫九河之
故形經兩海而紀象流兮擅浮沉之濯靈覽頽波而
懷明德兮又何莫非妣氏所經營登崐崘而俯視兮
固彷彿其初迹馭高風而騁望兮遂周游其曲直何
末流之混濁兮始清激而湜湜羌澹灩而徐趨兮勢
汙法而自得觸險石以闢暴兮詫雷轟而擊擊天宇
擴其沈澹兮渺上下之玄黃霧雨霏霏而滃集兮混
邃古之洪荒微風蕩拂而渙散兮天機組織其文章
頽焱浩而洶湧兮百恠垂涎而簸揚腥雲濁浪以盪
汨兮恍忽顛倒夫舟航靈曜升而赫照兮乘正色於
中央望舒在御而下臨兮列宿涵泳其光芒若乃震
秉符以行令兮百谷滂滂其棟釋山澤沮洳以上氣
兮增滉漾之洋溢魚龍乘濤以變化兮杳莫測其所



極祝融載節以南屆兮雷雨奮達以霽霑潢支流而
股合兮百川奔而來會木輪困而漂拔兮蔽雲日而
淘汰狂瀾洶而鬻岸兮塊土焉塞夫衝潰霜戒嚴而
木脫兮少昊執矩以司秋洲渚緬邈而石出兮始殺
滄而安流霰雪紛其四集兮顛頊乘坎以奮神大塊
噫氣而摩軋兮流澌下而龍鱗層氷橫絕而山委兮
河伯驅石以梁津羌險夷而明晦兮變朝暮與四時
颺風起而衝木兮躡恠駭其難推覩圓方之一氣兮
恒來往而密移昔尼父之歎逝兮跨百世而罕知顧
川流之有本兮與終古以爲期啓龍圖而翫六一兮

文集卷之一

二

悟主宰之所爲喟余心之未純兮感道妙之如斯聊
誦言以自明兮庶晝夜之靡虧

虛菴賦爲僉憲泰和劉咸作

觀堪輿之橐籥兮恒嘘炎而吸寒漠空洞而容納兮
神化繼出而源源混真精之微密兮生人物於兩間
何此氣之雜糅兮異明暗與強孱物擾擾而並進兮
慨中虛之委填雖暫空而還塞兮又何以納夫清言
聖覽茲之蔽濁兮啓象告之幽玄上呀然之澤水兮
下安安之崇山中闢以承澤兮澤下漫以潺湲觀
咸虛之受益兮知中私之可刊有君子之好古兮質

清明而粹完窺羲皇而求索兮仰姬孔以援板輦佳
名以爰錫兮寓虛菴而頤頽闢混沌以爲室兮鍵太
素以爲關列冲澹而爲榻兮鋪恬靜而爲莞幕天宇
之擴落兮鏡止水之澄灣延皓月以爲友兮抱虛明
之團圓撫瑤琴而寫中素兮清風去而徐還步逍遙
而徙倚兮悟達人之大觀飲太和而療渴兮味道腴
以充餐佩文史之璜璠兮服禮義之衣冠不先物而
內植兮恒洞達而平寬理無微而不蘊兮善無入而
不安知靜存而動出兮合大化之循環守此度之益
敦兮諒感通之何難顧余質之中窳兮慕夫人之閑

文集卷之一

三

閑願相從於廣宇兮長依倚而盤桓

雪賦

維月之孟陽兮氣栗烈而嚴凝歲忽忽而道盡兮闕
升降之機肩相重陰之蘊杳兮霰雪下而縱橫何玄
冥之工巧兮鑿六出之奇形初揮霍而散漫兮遂漠
漠而無窮乍大荒之微聖兮久川谷而俱盈灑長松
之落落兮玉龍夭矯而騫騰逐回飈而入竹兮磕金
石之琤琤被欽崆之絕巘兮若天吳起立而海波傾
訝城闐之方啓兮敞馮夷之幽宮捲前簾而凝睇兮
懸旒玉於簷楹九臯之鶴橫空而遠逝兮惟聞夫戛然

之長鳴舞瑤臺之佚女兮迷不覩夫綽約之冶容疑
地媪之効瑞兮珪璧磊落而晶瑩豈清都紫微之旣
春兮梨花飛絮而交零載瑤車而駕玉虬兮將遠觀
夫九野與八紘遵渤澥而東驚兮渺萬里之滄溟登
九疑而瞰南極兮祝融不炳耀其銛鋒循流沙而涉
弱水兮歷崢嶸之長冰臨大漠而晚中土兮山川紆
曲而齊同天地混融而爲一兮又孰別夫濁與清乃
旋轉而息駕兮獨恍恍於中庭四方上下皆在我闥
兮擴靈府之宏澄探元化於終古兮聊向風而抽情
亂曰洪鈞幹運一氣孔道兮四時相沓而翕闔何由
兮陽以陰肅思若仇兮閨寂無餘而發爛莫收兮虫
牟降伏三白肇休兮歲薦若茲我將何求兮

自備賦

皇降予以衆美兮實清明而粹全胡賦質之不猶兮
乃蔽昧而強孱自有識而發憤兮窺前備之闡關誦
古訓之數數兮服至理之拳拳雖苦心而極力兮猶
未從容乎矩步忽內怛而自備兮吾知其故善旣復
而或失兮怠與敬其交驚心暫開而或蔽兮理與欲
其紛互此實進退之機兮肇千里於跬步苟夬擇之
不勇兮將邪羸而正負蓋必於敬於理而保持兮於

怠與欲其屏去既經心以自明兮復誦言以自固庶
成性之存存兮全上天之所賦

思本賦

吾行年之匪少兮胡貿貿而靡思善惡原於杪忽兮
寢千里其遠而木油油而上聳兮波法法而載馳托
后土之鴻厖兮本大化之無涯肇總總之衆物兮咸
資始於天淵矧含靈之物秀兮孰有不自其先先昭
列而在上兮子孫繩其在下或一日而不思兮將原
竭而本仆或廣植而不食其獲兮或勤施而不責所
負渺河流之汪淫兮潤實漸於遐土啓我人以坦途

文集卷之一

五

兮闢我人以大戶既登名於薦書兮復顯仕於朝列
念積累之艱難兮恒拳拳而恐失服聖賢之明訓兮
索衆妙於微贖仰皇昊之賦畀兮保天理於晷刻謹
余識之昭昭兮匪他岐之敢惑潔余身之皓皓兮豈
外物之能涅是惟顧本源以自脩兮若見親於羨墻
行斯百而靡虧兮體毫髮而匪傷堅此志之罔替兮
愛此言之不忘敦忠孝而日新兮庶末盛而流長

古詩

禱雨効韓體

盛夏將幾月亢旱何赫炎山澤不通氣水雷更深潛

畢亦無所爲徒聞掛銀瓏豐隆久音默列缺寧窺規
蟻蟻閑深穴老蛟遯幽潭凡此衆陰類畏避何安恬
而獨哆口箕簸揚助飛廉微雲稍欲布驅逐無毫纖
陰氣歛將合極力故攪搏蓬蓬太虛內日夕恣併兼
既迎望舒轡復送羲和驟遂使平田中百物如燒燔
吏民紛祈禱土梗空巍岩擊鼓神弗聞旱氣轉覺添
焚巫果何計暴殪信虛談我欲款上帝上訴箕風讒
狂吹既清息長舌亦收緘得使陰陽和坐見雨露霑
枯槁總滋遂沛澤皆濡淹室家合飽足兒女無謫譖
永荷神力慈式歌大化覃抱此雖自奇臨期復疑瞻

文集卷之一

六

翫一齋爲柳克新賦

靜觀一理大寨闕竟難言惟於流行際特達見本根
胡爲岐路雜靈妙日已昏玄聖發曾子濂溪啓程昆
後哲總超悟殊途集同門吾友展禽齋古道性所敦
乃作翫一齋游處資操存極力屏群欲篤志收奇助
歛茲義理微芟彼枝葉繁始知千萬緒無不會心源
了此匪爲易仰視有蒼玄

舞陽阻雨留宿

清曉發昆陽綠野散朝旭夾道禾黍長泥濘淹馬足
東行得平岡舞陽忽在目入自西郭門兩街喜多竹

爽氣拂征衫清風戛鳴玉便覺人境偏似有太古俗
阻雨留憲臺倏忽經再宿永日覽圖書清宵散華燭
念此居處崇內顧王程速敢不勉忠勤而胡遂安欲
此邑足名賢王常韓韶炳相續明發登前途回首憶
高燭

宿信陽慈氏寺有懷趙侍御二首

禪室絕清灑夜景何寥寥白月墮簷隙涼飈拂林梢
有客不能寐起坐心勞焦所懷同心友相去一何遙
開門望天宇露冷河漢高恨無雙羽翰奮飛共遊遨
秉燭遂至旦詩成還獨謠

文集卷之一

七

山寺月皎皎流光入簾帷神清不成寐起視夜何其
天漢漑回轉參斗亦西移庭草滋繁露林竹生涼颺
撫景念良友渺在天一涯會面曾幾日成此遠別離
冉冉易寒暑悠悠隔山陂豈無他人好中情詎能知
所願得懽晤以慰平生思

舟行野湖中

湖水與天平波濤亦何壯我舟駕長風遠破萬里浪
玉節方在斯百恠誰敢僂明登岳陽樓八荒應在望

壘前

少小心好奇斯遊戲方狂雲帆拂逸天畫舫壓高浪

青山歷歷過可見不可傍
明泊洞庭湖邊當極邊
望龍陽山行遇雨二首

楚山饒古木楚水逸奇石
林霏暗不開石瀨瀉何急
久行路欲迷嵐雨互蒸濕
陟降童僕勞竟日未遑息
向晚落葉多攬轡更駐立

歲晚山行深山中水重疊
叢篁夾溪橋橋斷橫槎接
陰雨竟連朝雲林黯一色
虛風忽冷然蕭蕭墜黃葉
撫景復何爲內顧遠遊客

宿山亭

山深郵舍孤入門晚色靜
四顧足喬林蕭蕭北風勁

文集卷之一

八

向夕起重霏窻戶皎已暝
燃松代秉燭明暗光靡定
草草具杯酌何暇梨菓飭
乃知山林趣足發遠遊興
天明登前山清風滿蘿逕

瀟湘八景

余少時聞瀟湘八景之清致而未得一遊
也今年冬來湖南始得親歷而詳覽之遂
爲八詩以寫其趣

山市晴嵐

雨來萬壑昏雨過千岫出
晴旭楚人家蛾眉畫生綠
看看如有情餘光遠相逐

洞庭秋月

西風淨晚烟，天水遠相接。
瓊樓玉宇深，烟烟涵虛白。
夜久風露寒，一曲湘靈瑟。

平沙落鴈

霜清秋水落，風過人迹平。
飛飛隨陽鳥，相呼下寒汀。
向夕聚儔侶，月暎蘆花明。

烟寺晚鐘

夕照下山門，清音出烟霧。
暝壑一僧還，側佇尋歸路。
月上楚天寬，霜落洞庭樹。

瀟湘夜雨

文集卷之一

九

兩岸叢篁濕，一夕波浪生。
孤燈連底宿，江雨篷背鳴。
南來北往客，同聽不同情。

江村暮雪

落落漁樵家，蒼蒼起烟霧。
岸滑移釣舟，沙平失歸路。
似有凌波人，盈盈月中去。

漁村落照

釣艇收晚緡，歸鴉集疎柳。
天風吹彩霞，明月暎江口。
孤村一笛橫，萬慮復何有。

遠浦帆歸

翩翩投極浦，漠漠背殘照。
水榭歌竹枝，清風激幽調。

歸舟漸覺稀錯莫尚凝眺

微恙不出

客居養微疴久與人事疎早起無所爲盥櫛讀我書
我書有真味寧比膏與腴膏腴常有厭真味諒難如
自得復誰告撫心但躊躇

泊舟貽溪宿陽樓山下三首

泊舟清江潯肩輿渡澗溪微逕入叢篠蒙寵行欲迷
轉步忽開曠溪田間高平傍水野航小連林茅屋低
適遂情景豁寧覺人俗非山堂稍曛黑冥冥子規啼
草堂傍溪谷瀟灑無塵埃隱几流水去開牖青山來

文集卷之一

十

客情既虛靜遠目何曠哉弭節得周覽外慮仍侵懷
村落日已暝山岷猶未回念此不能寐遠抱殊難裁
窈窕入清溪側逕何紆曲魚梁截奔流雪瀨漱寒玉
空翠濕人衣霧雨滿新竹路窮上野航前登得平陸
日暮烟火迷似向桃源宿

舟中聞蟬

扁舟泛湘水水碧風日晴適有異鄉感忽聞衆蟬鳴
淒切篁竹茂斷續楓林青家園舊喜聽客裏難爲情
時節知已易遠遊心緒驚因念衆兒女依依候門庭

雖云憫中私尤當顧王程

湛湛湘水綠夾岸叢篁多挽舟逆水上南風起微波
嘉此晴霄景逍遙翫江沱沙渚曠緬邈雲岫紛嗟峨
遠日爲舒暢客意將如何濯纓吾所愛聊爲扣舷歌
至襄城

望諸葛草廬

文集卷之一

十一

襄城古名邑山水殊清妍我遊適已再入境心欣然
憲府絕瀟灑乃在城東偏停驂得所止景靜俗慮捐
修竹滿堂後翠栢當庭前攀折將有贈聊比志節堅
念之不能已長謡遂成篇

我行迫王程訪古少暇日曉出南陽門馬渡消河急
舉目眺西崗林木半蒼碧有祠中巉峨云是孔明室
使我心慨然攬轡久瞻立憶當炎祿衰四海皆橫溢
奸豪競虎吞孰知順與逆公時獨悠然放歌聊自適
及來耕陰中日以老所益高視千古人管樂自儔匹
有時發中懷長嘯獨抱膝寧知卧龍安還爲水鑑識
賢哉劉豫州三顧何汲汲問以當世事指掌皆歷歷
自茲出茅廬魚水情尤密後來大業興益見前籌力
公心果何如是欲靜群賊復漢還舊都志願乃終畢
柰何逢厄運終非智能及五夜星隕營三軍淚沾臆

至今五丈原悲風尚蕭瑟遂使英雄士遺恨無終極
今來望公廬咫尺不暫卽園井定依然遺像想猶昔
平林渺寒烟長巒帶古色所貴賢者居孰不仰遺迹
鞭馬復南行迴想猶未釋朗誦出師表沉思八陣石
浩浩天壤間奇才難再得他年擬重來更當展良覲
襄陽道中

曉醉新野縣午入襄陽境迢遞岡坂長曲折溪流靜
入村竹青青便覺異風景唯時霜雪繁歲晏北風凜
中私且撥捐壯觀極馳騁日暮臨漢江窮源思方永
扁舟過瀕史波濤任奔猛遠行足險夷吾心良獨省

文集卷之一

十二

登峴山

停舟漢水濱跨馬陟峴首漢北渺川原漢南足林藪
山水兩迴環地氣蓄不走城北一掌中名勝良不偶
紅樓杳難卽粉堞繁可取虛白瞰遠沙踈翠俯高柳
柳外居人家向背各開牖美哉風景奇詩興濃於酒
下馬復山行遺壘高培塿歲久悉荒殘戰骨亦楛朽
緬思前代爭南北此樞紐典午窺併吞元宋竭攻守
兵連歷歲時良田生宿莽力屈或不支乃爲強者有
而雖富土疆竟莫絕稂莠明運開萬方稽顙唯恐後

浩浩江漢間一洗舊昏垢詩傳二南俗人享百年壽

乃知皇力尊澤及生靈厚小臣職觀風登覽匪外諉
所願歌昇平彌億萬年久

峴山羊公祠

峴首羊公祠周圍帶草莽重是古名卿舍舟聊一上
雪消江路滑氣暖神奔敞捫碑澁蘚痕牽帷綴蛛網
字隱不可讀風流猶在想想當公昔年跨馬此登賞
顧彼山常存身滅足悵快寧知千載餘公名藏天壤
遂使山增輝過者悉瞻仰足明仁厚澤不與時世往
我來復何爲作詩墜遺響

遊習家池

文集卷之一

十三

谷口一逕入蒼山四邊開中有習池水水碧無纖埃
泉源初噴薄交流遂滌洌飛鳥鏡中度行雲天外來
微風一蕩拂林影久徘徊寒光空心性俯翫何悠哉
愛此不能去載歌寫中懷

遊君山寺

爲愛湖中山遂尋山下路躋攀轉幽邃澗谷亦毗互
石蹬足莓苔青林雜烟霧前行如有窮嵐嶺乍分布
招提壓重湖千里周一顧孤峯四無根形氣自依附
山僧復道我窈窕更徐步踈籬野蔓懸老圃寒泉注
逕轉山房深重與絕境遇白雲簷外生清風竹間度

庭花雜無名歲晏色猶故澄心得妙觀忘言契良晤
愛此林壑清遂薄塵俗務重來待何時尚子畢嫁娶
洞庭遇雨

孤舟行何遲歲晚洞庭雨跳波亂明珠隨風颺細縷
雲霧失君山波浪連吳楚莫唱班竹枝別思滿南浦
青草湖卽事

洞庭方始過青草又相續水落湖地寬冬暖草芽綠
遊目解孤悶卽事忘拘束艤棹觀瑤畱援弓射鴻鵠
取笑復何爲聊爾徇人俗

雨後臨雙池

文集卷之一

十四

時雨夜來歇雙沼朝欲平香草何瑣雜芊蔚繞岸生
俯竹瀉風露圓荷貼青萍顧此好備客覽彼衆物榮
徘徊彫彫檻徙倚當素屏採掇終有贈緬焉起深誠

雜詠六首

岩岩泰山石靄靄石上雲湏臾過八極霖雨竟朝暉
功成不言利收斂不盈分致此豈云遠舉目窺嶙峋
溶溶綠池水上有嘉樹林白鳥來何方集此清池潯
毛羽粲霜雪和鳴激流音可見不可卽徒勞觀者心
一舉冲青天虞羅諒難尋

江漢豈云廣一葦可以航山岳豈云大吾將陟周行

淇水有葦竹澧浦多蘭芳既自抱孤節還應發幽香
合併會有時遠抱非俗量

皇天無私厚一雨萬物滋朝樹滋膏沐庶草紛萋其
青陽舒景曜谷風扇和熙遠遊涉猷歲寧不感良時
唯山有奇石唯水有漣漪吾心諒誰告耿耿徒自知
悠悠世間物邂逅貴有時後來安劉者往日吹蕭兒
向非附青雲汨沒將何爲蒼蒼霜雪幹豈無大厦姿
山深少蹊逕匠石慎所遺

古劍匪新器古瑟匪新音雖無適俗態知已在所尋
充子佩服羨感子淡泊心蘊匱固有待無悶良可欽

文集卷之一

十五

新笋

方池錦萍蒲花草被四阿生意一何盛新笋池上多
綠苔已穿透粉籜方苞羅銳若毛遂穎森如羽林戈
朝翫夕已高舊竹時復過相期保堅節歲寒心靡他

會同院中

會同古蠻服市邑何蕭條霜臺絕清僻道院無俗置
芳草滋新葦高柳垂長條石砌滿苔色可以慰逍遙
行翳涼景蕭顧望白雲迢塵羈豈能繼何用山林招

澗浦雜詠三首

山縣孟冬交草木盡黃落官署何巖巖寒雨灑寒廊

讀書三十年志願常異豁相府既先登憲節復早擢
蠻荒過三秋征科愧才弱所願採蘭芷聊以比葵藿
深念方在茲無欲自欣樂

辰沅異風土十月足霑雨竟日復通宵清響徹烏府
久客厭聞之晏坐默不語經世志未酬讀書心獨苦
往事感中懷良辰復誰許悠悠付深期兀適自容與
漱浦絕小邑昔無名士遊我何秉憲節來此乃淹留
庭前高木落屋背荒山秋公廳靜苔色風雨寒颼颼
離別感時節得無念中州深衷如可致過是非所求

山館

文集卷之一

十六

稅駕日亭午愛此山館清藩籬翳嘉木但聞幽鳥鳴
開門遠翠來白雲望中生便覺臞者肥似有戰勝犄
野藟足充餐作詩紀茲行

渡雙溪

雙溪始合流崖渚遂經復澗潭一鏡平秋影空寒綠
野渡得孤航山家得喬木適意方自茲前呵戒僮僕
撫景重悠然誰能和斯曲

沅州元夜

五溪古荒服連延列邊壩自從啓明運便已變華風
民俗競佳節適與中州同我來一何久三見春燈紅

竊食飽官廩會無分寸功豈不愧伐檀還感飛蓬
今夕復何夕列炬當庭中行翳脩竹枝吟對梅花叢
翫此歲寒物舒我天游蹤言歸卽當歸掛席湖江東

贈趙彬

黔中山水奇產物亦秀異丹砂色光罔黃金質精粹
碧春石汰淘永煉土騰萃其他楸楠樟挺特皆偉器
因念上天公造物無私智不應山水靈而獨鍾斯類
竭來客沅州果愜向所意趙子生其間不與凡猥廁
蠻荒乏師友買書自從事子集聖賢文左右悉堆置
抽覽無停晷一一欲強記晝誦聲聒鄰夜諷響穿市
寒暑忘冷熱饑渴失滋味停蓄才思深馳騁筆鋒利
出語動驚人縉紳悉推避勤苦凡幾年銳氣久仍肆
邇來加歛收精識亦超詣雅欲求本根不獨誇文字
我昔從先人壯遊滿天地邂逅多賢豪殊趨各同至
談論隨有得皆足飭昧雜自忝臺閣官遂攬湖襄轡
方懼過不聞深恐德將墜忽於僻遠中得子喜不寐
我欲藉子砭我失任子刺所以愛子心誠實不虛偽
觀彼物性瑰時尚亟搜致况賢治之楨尤爲

國上瑞四門方洞開四目方遠視明堂要梁棟法駕

用麒麟子當寧厥需會起摩天翅

題太極圖

大小圈十箇都在一圈上如是究竟言一圈也無象

古詩十二首

爰初闢清濁悠悠千萬年三墳既已失古道茫昧然
神聖既有作人文漸開宣義軒御元極堯虞運中天
粲粲河洛秘密密精一傳太和良自茲玄功竟難言
萬理如何卽寤歎窺遺編

窈然觀化始本自同一初聖者惟其性大道瞞皇輿

云何千古後岐路如鎔銖西學外形器玄宗暢清虛

文集卷之一

十八

滔天勢方漲捧土誠爲愚不有諸老力生民竟爲魚
寄語後來人慎莫迷所趨

行鴻暢遠澤鳴條沛時雨白旄一以麾九鼎奠中土

三后同一功休明諒難伍云何王風頹故宫蒲禾黍

大雅遂寥寥遺音獨淒楚悠哉復悠哉白雲在高阜

水火非無功焦溺亦由此所以玄天機千載莫能理

君子得其操小人迷所止四海豈不遙發軔良自邇

泰山豈不高舉足不踰咫薰風愜民心簧竹蕩人耳

善惡反手間胡不慎其始

七百卜公且萬世期咸羸豈不同所願天道有虧盈

岐山麟鳳集函谷虎豹爭趨舍乃如此大運馬得并
蓬萊舟始泛溥浪車已驚遂使三秦士不獨驪山坑
已矣勿復言九宇皆炎精

靄靄商山雲招之正徘徊冥鴻一以縱畢弋胡爲哉
寧知羸豕壯躡躅多毒猜沉沉辟穀子爲謀一何乖
向非平勃力炎靈遂如灰獨有周南篇歌之有好懷
山空翹翹出天黑鳴鳥鳴姬轍既東邁岐路殊縱橫
青牛適西域大鵬抵南溟談天竟何益刺股徒首兵
紛紛險譎葦瓊瑣難具名有若迷方客甘心棘與荆
不有仁義篇何由覩天明

文集卷之一

十九

吾意六籍外尚多古人書一朝秦焰烈焚蕩無遺餘
掇拾煨燼者補綴誠區區詭缺固已多盡信寧非愚
獨有群聖心昭哉難翳如多謝宋諸老萬世開迷途
季子多黃金張儀富秦土腐鼠爭饑鷲豕競貪虎
周道久已非王綱如綴縷若岩養氣翁鳴鳳獨高舉
圓方遍九州周覽無定所天飈激和音雲漢濯文羽
大道今依然押闔安足數

日月自有明陰陽自有行萬物紛變化人事更衰榮
云胡道術裂瞋目談丹經泛海竟茫然樓居亦虛名
自古良若茲擾擾將何營

聖人無曲行大道無邪岐云何周轍東驅車迷所馳
楊朱學仁義莊老尚無爲申韓首法備蘓張倡危機
遂令千載下道術日以支樵悴莫之悅淳朴諒難追
此語匪爲誑書上有其辭

易莫易玄穹簡莫簡坤土聖心本虛明條達無曲阻
如何末學差崎嶇躓榛莽二者祛除之明白可深觀
多謝古老心相將感斯語

秋日雜詠四首

庭樹生秋風微涼入衾枕久客得無思遠意復誰論
道腴足充餐天和可當飲以茲撥離憂僻好安所稟
文集卷之一
廿
大義自古來旋履吾已審

翻翻高荷葉秋雨生微涼豈不懷遠道撫時坐空堂
何以爲我懼簡冊多遺芳古人不可作古道不可忘
茲理將無厭欲語墮渺茫安得忘言子相與傾一觴
亭亭紫玉竹爾節豈不堅托根自有地勿羞桃李顏
桃李圓妍好爾節重自保請看君子心浮雲湛秋昊
粲粲黃金花繞砌顏色好豈不重所思焉得致遠道
遠道不可忘感時歷炎涼人心豈此異保爾秋節香

述懷

少小習書史政自賴先德十五慈見背四十嚴永訣

追思鞠育恩，俯仰肝腸熱。中心恒孝孝，每懼有遺失。
早忝科第登中，厠縉紳。列榮耀，旣連綿。聲名頗烜赫。
小子心不然，自顧真有缺。國恩未酬報，孝思久虧。
越祇命湖湘間，久載憲府筆。一往三年餘，及歸有華。
髮家室，寄中原。無產給衣食，大兒亟假田。農作不遺。
力，次男失學，慣游惰。無儔匹，三子雖孱懦，芻牧無休。
息。昌子罷痴，小奔走，百不失寒。卽索母衣，饑則索母。
食，老妻亦何爲。頻年若煎迫，上以奉繼姑，下以撫兒。
婢，執爨色焦，槁補綴眼昏。溢我雖官在朝，蓬梗真浪。
迹，及歸若告，訴數子俱未室。生理况蕭條，僑寓亦何。

文集卷之二

十一

益我復對三歎，此乃其所恤。顧我有王程，尚敢懷私。
適勉強數日，留慷慨。一旦出悠悠，離蓬茅行行向金。
闕路，從黃河過舟，自衛水發舟中。忽有懷所懷，何歷。
歷吾聞古人言，老窮當固節。况我筋力强，所願豈契。
濶誓將篤忠貞，于以守清白。上隆唐虞治，下布雨露。
澤。祖禰如有神，光賁亦行及。拜恩省先塋，勒石紀世。
烈。裁桑汾水南，廣土中條北。旣足紓困頓，還可樹遠。
業。男女各婚嫁，親戚共周急。此事良可期，援筆聊自。

釋

習僻已成性於人懶將迎日暮臺中歸掩戶親一燈
但取書笑樂不顧俗重輕自得復誰語茲道將吾成
一室

奉使三年歸京華營一室一室陋且偏入門唯四壁
豈不憂窶貧所貴稱達人無倉廩儲心有宇宙春
頭歟復頭歟顛冥不知返周道能摧輪不在羊腸坂
惟河有天源惟山有崑崙擾擾勿重陳宴坐思探元
題思顏卷

零零雨露滋蕭蕭霜氣寒時物代榮悴君子感所觀
所觀一何苦時運靡終古俯仰天地寬思父復思母
文集卷之一
廿二
夢昧如見之溫溫金玉姿行坐或可觀冉冉霜雪絲
春風若在室機杼倚虛壁咳唾落珠璣琴瑟當窻急
顛倒將無厭而不間毫纖幽感鬼神泣明被日月霑
所以永言者誠孝不容假勗子勤蓼莪短章代風雅

右詩二首

驪珠出九淵炫晃稀世寶緘藏俟良價賞識待終老
云胡知者希衆道魚目好君子復何憂溫明但自保
津人善操舟慣捷輕洪淵來濟者誰子濡溺幾不全
顛倒受嗤薄中懷詎能宣請陳經濟畧視彼螻蟻然

夜坐二首

銀燭一寸光，照我千古心。心事諒誰語，秉筆空沉吟。
幽懷載草草，妙思彌情情。豈無楊子雲，視昔猶視今。
滄海豈不大，井蛙良自餘。至言豈不美，俗士恒苦拘。
賢哉顏氏子，妙領非真愚。若人不可即，即質將焉如。

讀陶詩

靖節一何高，理鑿時運表。返耕甘苦饑，棄世樂枯槁。
所以見諸詩，淡泊出天造。掩卷思其人，清風起林杪。

示兒

我祖自奚仲，奕代河東居。家本尚儒素，業豈羞寒虛。
先君紹前烈，奮迹由詩書。勤勤教諸子，爲善樂有餘。

文集卷之一

廿三

藐孤欽誨言，而敢忘斯須。憶從向學日，爰自非角初。
吟哦竟朝昏，誦習忘饑餉。收歛心自得，放佚已不趨。

周旋恐失墜，日奉庭闈娛。立年忝科名，嚴訓充渠渠。
進學固無怠，卽仕其慎諸。承懼會幾何，風木俄悲吁。

追慕復何及，首疾心更踰。中間趨明詔，皇渥彌寰區。
祿有不家食，官有臺閣居。循才覺孱弱，索報知幾如。
以茲寵若驚，自治如蓄畬。更念汝四子，賦質各有殊。

當思祖澤長，勿貽汝父虞。汝父豈可師，不有賢聖歟。
孝友亟敦勵，心性勿填淤。匪善人莫交，匪義財莫需。
止酒戒狂誕，窒慾謹湛孺。從慾劇墜石，放言甚奔車。

言多必招疾惡積終殞軀人生有定分造化司柄樞
窮達由天然富貴非人且歛跡甚勿競閉戶宜自慮
但使德學充不愧金壁儲達卽思致澤樂卽思賢儒
小子敬所植永久期無逾

新燕

高堂新燕子當晝語喧聒雙雙葺舊巢啣泥自寥廓
巢成去還來莫負明年約

楚楚者誰子

楚楚者誰子意氣何軼人居若無儔匹獨步莫敢親
姬公雖大聖尤尚吐握勤此道久已非擾擾勿重陳

文集卷之一

廿四

翩翩誰氏子

翩翩誰氏子鞍馬殊輝光入門佚興發促步登高堂
妖姬列左右哀彈送清觴酩酊百不憂但願白日長

荅趙彬十首

余知趙君將十年矣近又會於京師惜乎余力不
能振之也雖然君子求其在我者而已用舍遲速
非所汲汲况如君者又當待振與否能爲之輕重
者哉余近有山東之行君以十詩見貺反覆誦玩
不能已輒依來章以荅其意云

美人生南國艷色世所稀明眸一回顧草木生光輝
我行重絕情便欲携同歸贈以青玉案貢以黃金扉
如何久契濶此念將無違

右荅青青嶺上松

仙山有高梧玄圃足脩竹飄然九苞鳳下覽遂所欲
流音散天飈文彩絢朝旭泰和良在茲瑞牒光前錄
右荅冀北生騏驎

層雲生岱宗時雨遍東海杏壇宛如昨聖人教猶在
况當時運熙文風盛而藹翹翹士林英無不生光彩
我行亦有爲檇樓詩當采

文集卷之一

廿五

右荅泰山何岩岩

峩峩憲府臺鬱鬱臺中栢顧我樛散姿繆作乘駱客
悠悠今幾年區區竟何益寧知憂窶貧但自保貞白
中復荷寵光分符海東域得觀鄒魯風載露詩禮澤
皇仁一以敷菁莪共欣悅猶有江湖心時將戀天闕
右荅屈軼生堯庭

馳車出都門遙遙指齊魯念子不能別對景獨容與
垂楊衰薰風輕塵衰朝雨仰視雲間翼分飛無定所
丈夫方有爲離憂寧足若願保金玉躬潛脩繼前古

右荅扶桑日初出

鶴鶴在一枝鯨鵬起千里達人足大觀曲士馬足擬
所以君子言觀海難爲水大哉天地間舉目皆至理
努力探化元高歌望吾子

右荅丹砂生楚國

天運行不息君子恒法之乾乾不自已汲汲非所私
仁義存諸身有蓄必有施旣非淺俗觀當負遠大期
吾子安厥需彙進寧亦宜

右荅日月易流邁

丹山有文羽和鳴向青霄滄溟有潛鱗一夕搏扶搖
如何賢達士其心向漁樵諒懷肥遯志恐負山林嘲

文集卷之一

廿六

休明盛夔契于焉共逍遙

右荅珊瑚生海底

吾觀天地大萬物同一源如何末學差坐此枝葉繁
鉛華滅素質雕蟲失本根憶昔南遊日得子同晤言
圖畫發幽秘身心契真元邈哉追前脩此道期共敦

右荅大道久不講

古來賢哲士用舍皆無心所以窮達間一節良可欽
趙子不浪出客居時光簡矢心永無斃感子金玉音

右荅古人重出處

文清公薛先生文集卷之一

古詩 歌

穆陵關夜雨

暝色來遠谷清風動華燭山樓雨聲寒羅帷人獨宿

山行二首

山鳥有清音山花有異香但得山閒趣寧辭山路長

又

荒岡斷復連風葉散還集霜落秋澗清烟橫晚岫碧

作息吟

文集卷之二

向晚群動息向曉羣動作群動作息間乃是先天學

東平行臺有竹翳於惡木荒草命僕芟治嘉植

乃遂詩以紀之

生平苦愛竹義若君子交茲軒忽見之俄頃漆在膠
振衣步其下周覽增鬱陶惡木一何多蔓草一何饒
翳此破苔笋撓彼凌雲梢命僕恣剪伐得辭斤斧勞
除惡貴絕本蘊崇及溝壕荒穢既了了涼風亦蕭蕭
修莖遂生植嘉蔭愜遊邀作詩紀顛末庶爲同心謠

穆陵關

危哉穆陵關高出衆山頂地勢愈覺寬天宇相迴迴

林木何蕭森首夏風色冷山樓試一登眺覽恣遐騁
沂岱環西陰淮海接南嶺齊州走北川扶桑控東影
道里會一門山川掣要領緬思千古前豪伯互吞并
齊履空復然秦蚕已侵境干戈被長蠻生民困魚鼎
于今天道旋四夷守安靜山行晝落然水宿夜無警
顧我觀風人符節得屢秉作詩紀茲行傳與山將永
蘭陵懷古

早發邨子國午至蘭陵邑蘭陵久已荒禾黍帶荆棘
惟有古寺存逕入林影密老僧知我來出門遠候立
下馬問往事爲我指遺跡蒼茫古城東墓有荀緡石
文集卷之二
二
我欲徃尋之還爲野水隔憶昔周室卑蠻荆凌上國
茲邑乃其疆人物殊烜赫寂寞千載餘浮雲空古色
如何當日賢重有逃讒責只今文字存尚爲人指摘
鞭馬舍之去極目遠天碧

敬吟

人惟肖天地亦具天地性性無物不存存性惟一敬
心敬體不偏情敬發必中頭敬形端直鼻敬氣肅靜
目敬無邪視耳敬無妄聽口敬不妄言身敬不妄動
手敬容必恭足敬容必重瞬息敬存身早作敬致用
致用在天倫天倫敬斯定夫敬必先義婦敬必從令

子敬孝必階父敬恩必盛臣敬百職備君敬萬邦靖
兄敬篤其愛弟敬謹其行朋友以敬交然諾必重應
敬則倫理明不敬百行病仰惟古聖人一敬更相命
堯欽帝之宗舜恭明兩並祇台念禹德日躋有湯聖
文王安敬止武王勉敬勝篤敬傳孔業敬德著周政
敬惟群聖樞大訓迭輝暎下逮河洛儒紹統開迷逕
整肅嚴隄防主一謹操柄惺惺不昏昧收歛無餘剩
用力在斯須百體孰敢橫聖途漸可登聖言良可證
一敬苟不存萬欲皆奔縱身心墜卑污綱常滅天正
禽獸將同歸人類孰與共噫嘻敬怠間狂聖越天阱

文集卷之三

三

法言述聖謨匪曰小子伎

送楊叅議三首

白露下將夕天宇生涼風之子有所適告別何匆匆
群公盡祖送飛蓋凌長空停驂樂小曲列宴歷亭中
秋容瘳觴酌高風急絲桐酒盡嚴將發班馬何玲瓏
竹當釋塵鞅還應掛飛蓬大江轉吳楚重山入天叢
錦城有佳色浣溪有遺踪訪古遂舒嘯觀風足從容
坐令全蜀俗解與鄒魯同茲遊豈云易兩情若爲通
翹首遲歸鴈應是春花紅

右分韻得紅字

林木生涼鷗鼻蘭被清露念子三川行正值九秋暮
天空一鴈翔江遠孤舟鷺旬宜有佳興載詠茸棠句

右分韻得露字

岷江瀉東溟岷山倚西極江山古名秀楊君將此適
秋風送征帆夜火明水驛相憶瑤華音看取東飛翼

右分韻得驛字

友鶴軒

九臯阻且深潔自有佳鳥中霄忽長鳴清響徹四表
開軒一聽之衆理悉明了蜂蛤藏洪淵秀氣浮浩漭
良璞在崑岡清輝散岩罅雅興與茲同至德潛且皎
文集卷之三
温温聖者懷大道思遠紹友鶴名華軒存誠絕外擾
水積成川流木壅盛顛杪功深效豈微響大聲不小
懸非風雅才作詩心自慄

冬夜懷魏希文

希文名純山東萊州府高密人時謫戍玉田

冬夜氣何厲冰雪輝前楹單居不能寐懷我舊友生
竹雲去不息賓鴻各時征兩情曠難合欲語誰當聽
惟有寒月光見子心宇清展轉遂至旦遠思徒營營

余既作此詩至來年三月間有党厚本者關中士
人也先任敎職又爲縣令後謫戎伍間復薦薦授
荆門州幕職道過榮邑党先與余有故因復問之

始知吾友希文亦以薦至京師未及試用而死矣
及考其死之冬適余作詩時也嗚呼希文純古君
子將謂其不終老於草萊也而乃竟止於斯豈非
命與且余作詩時適與其卒時又相先後亦豈非
平昔交遊之深默有所感歟嗚呼已矣時宣德二
年春三月河東薛瑄識

答仰宗岱寺丞見貽韻

念子青雲器早涉青雲路行行捧德音聽言省民務
風俗廣咨詢幽隱亟告訴來爲人所悅去爲人所慕
皇澤一以敷郡國足膏澍况復崇文儒士林喜披
霧心涵玉壺冰氣裊金莖露懷哉明盛時展矣風
雲過而我同官良惟子荷與顧通籍來旬宣各自植
嘉譽獨有蘭臭言祇以同心故選膺篤忠良更此寫
中素何當展良覲相期在秋暮

題陳希夷圖

三峯亦何峻白雲亦何多中有高世士冥栖掩松蘿
石泉漱寒玉好鳥間清歌歌長一披拂紅紫爭紛羅
山隔五季塵年頽萬里波豈無經濟策肥遯矢靡他
威鳳不浪集冥鴻難重過清心探化機瞑目養天和
真息深在踵利貞靜不訛只疑龍蛇蟄不管歲月梭

我欲昇玉井濯手攀嵯峨扣關起公語妙理應如何
欲去還自休馬圖今在河

永慕堂爲楊大參賦

大化運不息逝水無停時依依舊居室惻愴中腸悲
書殘讀遺編機有餘斷絲斑衣不再舞壽觴寧重持
庭前百卉芳但覺陰陽移儀容切寤寐恍惚如見之
親心我所安親志我所期心志著且存大節矢靡虧
悠哉孝子情竈此終天思

遊禹門禹廟在焉

春澤周四野閑情樂時和出郊縱逸興緬懷佳山河
禹門忽在望峭壁雲嵯峨石磴接飛棧危樓架洪波
空山響絲竹虛堂進舞歌父老誠苦心旨酒神所呵
由來非一朝吾意其如何

河汾五賢詠五首

卜子夏

浩浩西河流遙遙東魯山山河遠相隔千里獨遊還
升堂輿可入豈曰文辭觀相從陳蔡厄松栢知天寒
索君晚歸來侯國師其盤去之幾千載高風灑塵寰
瞻望不可及青雲映西關

段干木

冥鴻不受弋神龍不可羈所以高世士孤情薄雲霓
矯矯段干木志節一何奇珪組豈其願軒冕不吾希
踰垣猶弗見况乃趨走之豈徒侯國尊凜爲百世師

文中子

古人不可見古俗寧復淳依依萬春鄉踈屬連清汾
良時曠莫與鳴鳥寂不聞悠悠禮樂志終與麋鹿群
頽波逝東極寒雲滿西津惜哉經世言淆雜多蕪榛
時無伊川于此意將誰論

太史公

愛有所見愚忠有所見疑古來非一朝人道每如茲

文集卷之二

七

悠悠太史公言論適有期謂必情可白寧知事參差
奇文雖自解騾驥諒難追巷伯彼何人千載存其詩

東臯子

人仕爲其名子仕獨爲酒一斗衆所稱五斗吾自取
猶嫌酒未足棄官歸隴畝葛巾耕東臯烟雨牛一耦
種黍學陶翁自釀還給口沉飲得真味萬事亦何有
清風千載餘誰復尚能友

古詩

天地常不沒山河鎮如斯惟有人與物代謝無停時
因過咸秦境周覽生悲思渭水自縈帶南山亦參差

茲惟帝王宅自古稱雄奇當時官闕壯摩霄切雲霓
千門與萬戶珠簾錦綉帷一朝時事去掃地無復遺
城市盡爲墟麥秀草離離亦有英雄輩干戈互相持
慷慨爭土疆終老志不衰只今但丘塚名姓寧可知
京都足妖冶高門富姜姬綽約姑射仙鬢髮冰雪肌
只今化爲土况乃粉黛施休明盛文物旂常畫蛇龜
千乘及萬騎雜遘相追隨將相立軒冕聲樂奏莫池
繁華有萬端一去不可追俯仰千古事有若夢幻爲
往者旣已然將來復如之寄語執迷子當以理自推
浩歎

文集卷之二

八

浩歎復浩歎寧知親眼見相彼天雨雪必有先集霰
蟻穴不知防鯨波今汗漫君子慮兢危小人尚欺誣
已矣無與言歸去咩吾咩

瀘川古意

三蜀古名郡瀘川古名州我來值殘暑偶此數日留
新秋忽改節涼風漸颼颼逍遙散前除仰視天宇周
征鳥去不息白雲亦悠悠佳人渺何許重林蔽層丘
秋日復西邁大江自東流良辰不我與古道曠莫酬
願聞瑤華音行矣旋吾鞫

五盤何艱哉石磴繞山腹詰屈入雲霞回互下崖谷
嗟彼遠道人陟降勞筋骨跋馬登層巔悠然注遠目
惟見山色高似覺地勢促蜀道古艱險茲險申西蜀
憶我去春來山山正芬馥今夏喜北歸四月暑未燠
茲山得再過頗快登覽欲前驛望黃壩蒼蒼但雲木

登金牛驛樓

好山四巖窅漢水前縈繞小樓試一登山水青未了
因思大禹時洪流方浩渺乃竭胼胝勞神功彌八表
岷山在經紀岷江亦疏導貢賦分九州梁州已通道
世傳金牛誕會不細搜討山驛賦短章將爲愚者曉

文集卷之三

九

七盤道中

曉度七盤山北行道彌惡峭壁根虛無危棧架飛閣
飄飄風吹衣漠漠雲漲壑下有黑龍江亂石何磊落
急瀨轉雷輟奔湍散流沫洄潭更陰沉俯視誠可懼
茲路屬再來卽事情已昨艱險難具論惟與存顛峯

褒斜道中

褒斜一何長深谷自迤邐雲木青無邊群峯各峻峙
鳥道緣崖巔危棧架江湫冥冥叫子規決決響溪水
累日山峽中陟降亦勞只古來蜀道難此道難莫俟
自我入蜀門今已一年矣旣乏督辦能兼負素餐恥

而况鬢髮蒼胡寧不知止上章乞解綬詔許感不已
雖云此谷險且遂北歸喜行色宣柔毫庶用傳孫子
遠道
遠道復遠道驅馳何草草及歸已踰年白髮添不少
入門悼先亾痛哭傷懷抱子婦共號咷百感相煎爍
拭淚問里閭嘆逝驚莫保衰殺誰使然矯首問蒼昊
從此甘息機田野安吾老

孟城驛雪中詠竹

高沙有候館闌檻殊幽清檻內足凡木凋萎不可名
獨彼凌雲竹鬱有冒雪青飄蕭散寒葉俯直搖蒼莖
靈籟奏青響鏘若金石鳴晴霄吐華月流影亂虛明
賞翫竟朝夕似當西南朋乃知歲寒操匪獨松柏貞
矢心又不如愧我爲物靈

徐州洪

亂石何巉岩長堤更宛轉狹岸忽陡起急瀨如注坂
回旋聚流沫駭浪灑雪霰舟行良已難下上勞拽挽
翻思遊川峽江石尤險遠瞿塘十二灘波浪激雷電
迴視過茲洪反若歷平坦乃知所覩大小者不掛眼

淮南謳

淮土何漫漫淮水自悠悠小山去已久桂樹遺岩幽

昔有學仙子意欲仍丹丘秋石旣烹煉鴻寶亦藏收
雞犬竟莫聞竹雲去難留寧慮時事異翻結千古愁
舞榭荆棘生歌臺麋鹿遊信知希世事伊豈望外求
揖讓有堯舜高風想巢由此道久已非聽我淮南謳
高郵水泮發舟

晚泊高郵城雨雪竟連日念彼役人勞寓此孟城驛
扁舟候晴發河水復鱗積因之累宿留令我心恫悒
忽報寒沍解喜泛春流碧直過大江東此地成追憶

水解舟發

春水渙然釋春流復溶溶解纜孟城驛百尺牽東風
文集卷之二
十一
連翩大舸來裁裁掛飛篷登艫恣春覽烟華正濛濛
澤國曠無際重湖渺渺難窮漸覺高郵北行及廣陵東
所過足清眺舟人莫怒怒

出自城北門

出自城北門周覽快心目裁裁鍾阜青漫漫平湖綠
水依長堤茂樹隱芳洲曲縹緲天際樓高下林間屋
遙遙江上山連連遠岫出江山自雄奇 帝里在經
復佳麗從古然嘉氣方葱鬱官署何巖巖列宇面山
麓偶茲吏隱兼頗遂蕭散欲超哉復超哉白雲自相

逐

晚翠亭爲張司徒作

花木何紛然各競芳非時一夕下霜霰憔悴無故姿
巖巖司徒府後圃殊遲迤而於歲寒日挺此萬竹枝
群芳盡搖落茲物獨見竒密葉既不凋勁節亦不移
一逕入深處橫橋夾清池池亭晝虛敞晏坐生寒颺
清影落四簷靜與秀色宜適契君子節貞固老不衰
爲取亭中琴絃我晚翠詩

澹菴卷爲謝侍郎乃兄題

閩山何岩峩閩水亦清泚中有肥遁人雅志丘壑美
山田入雲耕結屋傍流水耕稼有餘閑琴書時復理
文集卷之二
十二
寄興槁梧中游心竹素裏庭戶無囂塵外物絕珍綺
跪食足充餐絺布良適體朋來無雜言談道而已矣
至樂旣無假浮榮鳥足擬所以忘歲年足不至州里
白雲在高丘鳴鶴在中沚安得躡輕風一訪澹菴子

擬古四十一首

天地形之大陰陽氣之尊伊誰知此物來自無極門
清濁旣莫離動靜互爲根大化去不息至理亦長存
彼哉虛寂子已矣無復論

悠悠復悠悠水中宥行舟四序無淹畧代謝不可留
春鳥寂無聲寒蟬號素秋落葉滿阡陌白雲散岩幽

去去莫復道，頴陽有遺老。

庭前桂花發，清香散涼颺。采采黃金英，傾筐方自持。
思欲贈遠人，風波阻長岐。望望不可及，馨潔空自奇。
吾思古聖心，迥出八紘表。天理爲之大人，世爲之小。
堯虞禹相授，杯水拱揖了。終古駭其事，未足稱達道。
四時一何神，變化不可測。陰陽旣交代，星辰遞羅列。
孰其主宰之，終古不差忒。聖人秉明靈，動息有真則。
吾慕魯中叟，矢志以學易。

端若憶遠遊，路經首陽山。山有二賢祠，青松蔭重關。
斯人難再得，守誠心獨安。清風激頽俗，高義越人寰。
文集卷之三
十三
去之幾千載，可慕不可攀。

騶虞獸之瑞，麒麟獸之仁。物性尚不殺，而况形爲人。
夫何周轍東，王道久已湮。孫吳騁狙詐，申商號無恩。
流毒劇洪水，遺黎苦漂淪。強羸滅諸國，三戶亾咸秦。
天道信反覆，永爲來世陳。

聖治奠九有，禹跡亦茫茫。王澤旣饒洽，藝倫復昭彰。
以茲熙皞世，舉俗躋樂康。胡爲古道非，極意開邊荒。
征行苦鋒鏑，飛輓失耕桑。民生旣騷屑，天和亦乖傷。
廣土竟何益，不救危與亾。茲事已千載，雄豪有秦皇。
荆山有美璞，巴蜀多名材。此物信爲奇，攻治亦難哉。

匠石得其良寶就成層臺胡爲用匪人坐此斲削
既自玉之玷還爲目之災而况上天工理代必汝
鍊覆良可慮棟撓諒難陪所以虞周聖登庸必賢
湖邊多楊柳山上多松柏松柏存正性不改青
楊柳易爲春隨風發枝節二月絲垂金三月絮飛雪
紛紛台遊子賞翫不知歇松柏寂無言枝榦獨撐
空以木自奇不爲時所悅請看霜霰餘榮悴居
時來行堤上春氣薰人心宛轉湖山曲隱映花
辛綿草抽綠蒙茸柳垂金鳴鳥何間開纖鱗或
生物方總總大化亦駸駸當時浴沂者樂意不

文集卷之三

十四

混沌鴻濛中伊誰作主尸洪河出龍馬清洛浮
有文絜以別實惟天所爲悟彼陰與陽契此偶
大聖發深智運意畫兩儀生生之謂易變化無
宇宙豈云大彌綸靡有遺如何千載餘圖象閱
卓哉弄丸子探源迥希夷從茲識姬孔還應見
伊闕有遺編學易真吾師

又

灼灼春庭樹開花漸離披因思唐虞世日方亭
大禹亦神聖兢兢爲保持如何百代下此道久
臺亭王格之請看大易辭

木腐虫蠹出氣乖脆贅生曜靈一薄蝕陰暄鬱然興
道術裂周季縱橫亂秦嬴青牛旣夙駕白馬亦時征
汎濫自涓滴熒赫兆星星多謝宋諸老萬古開昏冥
如何陽光發尚自燭火明寄語行路人勿迷棘與荆
萋萋湖邊草榮榮山上花山中有高士探化心靡他
天地自橐籥萬物從交加深居不窺牖四海皆森羅
我欲見其人捫蘿陟山阿山阿忽回合冥蒙起煙霞
至道誰復語柰此高士何

太虛浩無際何所立天堂坤厚大氣舉地獄置何方

此理亦昭哉妄見胡冥茫萬世爲之惑福果僥難量

文集卷之二

十五

高標拔地起飛宇就天翔搏刻土木梗鏖劑金銀姓
人力爲殫竭財物亦耗傷旣自息吹乖焉得寒暑常
茲事自前季滔天勢彌張反經如可作興言討彼狂
圓象無停運大化不可留征車旣西邁行舟復東流
轍跡苦相背兩羨焉得有青松生澗底白日麗高丘
餘光不迴照真榦空蕭颺去去莫復道零露滿春草
五陵多俠客三輔足貴豪園池占佳勝高第干雲霄
不惜千金重雅意一日遨綺筵饌水陸清歌間笙匏
酒酣視天地泰山一鴻毛中情旣昏惑外體亦勞焦
誰似林居子神理恒超超

在陰鶴相應遷喬鳥當歌琴書蒲榻席良朋亦已多
各愛芳菲時共惜光陰過齋心何所求所求保太和
壯年不努力柰此老大何

白雲在高丘綠蘿在深谷中有冥棲士雲蘿蔽茅屋
獨抱尙友情緬遂頌人軸古琴時復彈古書還更讀
逍遙無外事俯仰長自足沮溺耕在野姜叟釣涓曲
伊人豈無心恥銜荆山玉將須鳳來儀朝陽蒲梧竹
庭前雙榴樹葉密枝相交時當四五月吐花紅夭夭
人愛花爛熳我愛花始苞堯夫有妙識造化滿卽消
情知酌醕醉還見離披凋所以大聖人持盈不忌勞

文集卷之二

十六

吾今老學易看花遂成謬

虞帝尙欽恤大禹泣罪人所以聖者心天地同一仁
周政失其御侯章僭無倫芻靈旣莫施作俑亦不聞
秦穆一朝逝殉以三良身臨宄殊慄慄仰天亦悲辛
古猶惜纍辜如何殺俊民王誅一以失流毒蕩無垠
驪山錮重泉銀海通幽津遂使三秦衆半作地下塵
天道本好還羸族亦沉淪因歌黃鳥詩重爲仁者陳
迴觀自古來黃金世所急郿塢幾萬斤梁苑億千鑑
貪求刻人骨堆積盈家室寧知造化權隨時有消息
人無長盛年物無不散日金穴竟荒虛金谷亦空寂

發塚尚有儒胠篋豈無力長見聚金人終爲大盜積
往者旣悠悠來者方役役肯哉莊生言獨無郢中璧
蒿萊不招鳳梧桐不栖鷄物故各有趣高卑焉可齊
伯夷居東海呂望釣磻溪峩峩太行顛蒼蔚方朝躋
陽光燭四表發軔岐山西二老旣云徃婦子爭扶攜
固知賢聖人去就關崇卑試聽紫芝歌坐見羸道隳
王良稱善御時方尚詭遇季子洛陽歸張儀關中去
佩印誇鄉里驅車塞道路說合縱與橫而兀貴將當
孟軻陳王道反爲迂濶誤已哉無復言遠矣哲王王
驪珠不易探至理不易論端木稱達者性道猶弗聞

文集卷之二

十七

五十知天命玄聖有遺言區區事末學役役勞其身
葩藻滅素質聲利迷心源有若亾羊客祇見岐路分
何當息真升來復求其根

孤桐生龍門繁絲出東國相合爲素琴不離君子側
清彈何悠揚遺音爲發越中涵千古心養彼至人德
云胡變新聲絲竹半夷狄繁響難具論哇淫日淪惑
舉俗逐時好誰能稱在昔萬事亦復然不獨琴與瑟
吾思一氣大渾渾無邊方天機自流轉隨至亾低昂
寒暑旣代序日月亦運行庶物勃然出滿虛各有常
萬化定厥基終古爲維綱大哉庖羲聖有畫絜以章

易道諒斯在請看陰與陽

吾思涑水翁志節一何高
褰裳辭宥密視若秋鴻毛
古人不可作流俗正滔滔
色過夏畦病意甚乞墦勞
趨走信機巧苟得還驕豪
閒詠青蠅詩載翫碩鼠
嗟吾思魯公儀拔葵去織婦
傅翼兩其足實惟天道故
云胡世君子大得兼小務
生殖廣田園販鬻罔泉布
牙籌旣自執龍斷復登顧
彼哉何足言義利各有悟
蝸鳩笑大鵬夏虫疑寒水
語之斯道大心識何蒙冥
屬文篋笥滿讀書棟宇盈
徒勞一生力了無寸見明
誰言黠也狂鼓瑟有深情

文集卷之三

十八

月盈乃生魄陰極陽復來
損餘補不足天道良昭哉
淳朴日澆散斯理亦何乖
旣剝猶未已豐亨尚增培
君子過佚樂小人窮之災
所願均厥施九域登春臺
萬鍾固知富於性無加增
千駟雖云衆難爲身重輕
達人抱大觀不以外物嬰
夷齊首陽餓伊摯莘野耕
清風激千古賢聖留其名
邈哉務光讓鄙矣蝸角爭
蠅營徒爲爾鴻飛自冥冥

青山何岌岌白雲自超超
雲山日在望開門兩相高
旣喜山靜止還愛雲飄飄
秀色可攬結吾其陟山椒
大氣浩無涯厚地大氣舉
形氣自依附人物乃中處

剛柔生變化陰陽行寒暑自古謂之然滿虛寧可數
吾思弄丸翁深情契斯語

丹轂旣云飾翠蓋亦時張駟馬復在馭鸞和自鳴鏑
執綏者誰予升車氣揚揚迴旋逐水曲馳騁登周行
行人爲之辟誰不羨輝光胡耶覆餗誚而置卻鼎章
輪輿雖云美致寇安可量所以大易辭負乘著厥祥
洪荒日已遠文籍日以繁華僞滅真實汗漫迷本源
左氏已浮誇戰國皆詐言班馬揚其波蔚宗助其灑
繼者如蝟毛美惡愛憎間諒非董狐筆盡信誠爲難
誰哉法宜聖大典垂不刊

文集卷之三

十九

人生苦不足得隴更望蜀祖龍泛海行劉卽祀竈術
仙事俱茫茫百年竟飄忽汲汲復營營何時滿所欲
吾慕首陽翁清風在山谷

庭樹微飄落涼氣始披拂却憶少年時泛舟湖湘曲
秋風起波瀾寒霜下林麓日出江上楓霧隱楚岸竹
蘭芷亦蕭條菱荷不秋馥靈均舊遊處騷思方滿目
忽忽三十年涼意復相觸九歌有遺辭得意在雲谷
庭竹生涼颺明月從東上候垂草根鳴夜靜聲愈響
逍遙步階除悠然起遐想三皇五帝時淳朴竟焉往
王風降黍離禮樂委榛莽反復千載間夷霸雜相長

是非垂不泯勝負在俯仰令人意難平撥置聊自廣
人巧千萬端莫造造化巧三王行仁義子孫永相保
綿歷百千載順理得終考嬴隋南北朝竊國騁暴狻
社稷旋荒墟苗裔悉剪斲天巧必勝人人巧何足道
出金陵
金陵宿雨霽杲杲秋日明繆承北闕召促裝出西
城追隨冠蓋集酌別臨江亭徘徊不能別去任難爲
情掛席曉風發解纜早潮生抗手謝送者令人意難
平所願各努力令德崇端貞

江行三首

文集卷之三

十

石城上朝旭宿霧漸已收大江何茫茫柔櫓泛中流
鍾阜猶在望白雲散岩幽兩載寧無情湖山憶同遊
佳勝邈難卽迴想空悠悠

順流駕長風掛席何快哉青山若相送兩岸猶崔嵬
恩召信光渥報稱知非才貞白有君子寧不動中懷
我舟旣云邁長風起層波天水共渺茫雲岫紛嵒峩
石城猶在望赤岸還經過遠堤秋樹小水國蒹葭多
老遂金陵遊柰此佳麗何北歸已陳跡江行遂成歌

過儀真

忽忽過儀真來往已三度茲行復祇召嚴程還北去

湖田收晚禾長堤落秋樹已遠金陵山漸近廣陵路
乘月宜舟行牽者且莫住

夜泊廣陵

夜到廣陵城已是三更後官舡少停泊驛吏勞奔走
風清月色明河漢祭屋斗行思方搖搖懷古復何有

高郵

又見高郵城連延傍湖水水上紅繹樓登眺憶往歲
昔逢春雪飛今值秋風起歲幸與人事更換理如斯
中賔諒自保期不愧行止

高郵湖

文集卷之二

十一

去年舂春雪揚帆過高郵今歲屬秋暮長風送我舟
湖心射日氣駭浪蹴天浮觀象卦有渙悟易情悠悠

淮陽懷古

淮陽古名郡卧治有昔賢禁閩不可留遺想增慨然
顧我豈其儔寵擢何連連本乏實德稱重爲虛名幸
撫心益自愧懷人遂成篇

雨中渡淮

風雨渡長淮波浪何真茫兩儀混不分恍若窺洪荒
舟人貪利涉片席就空翔翩翩入煙霧隨風任低昂
北岸泊水驛暮雨益淋浪且喜對官燭燦爛竟夕光

清河晚晴

向夕起長風秋雲靜天宇清波流月光白露下寒渚
榜人喜晴鬻理楫夜相語早發過鍾吾漫漫見徐土

夜上呂梁洪

水村夜寥寥秋月流空白牽舟上呂梁逆浪湧寒雲
愧彼役夫勞當此灘水溢憶我四方遊江湖飽涉越
祇召復茲行息重知才劣矢心復何如長洪石如鐵

過徐州

去年春正月南泛彭城舟今歲值秋暮北上遡長流
蹤跡信往復景物慙觀遊風寒堤柳落波減岸石稠

文集卷之二

廿二

白見高城堞蒼出遠山丘何處戲馬臺彷彿燕子樓
化遷無停軌事往不可求陳跡竟泯泯虛名但悠悠
覽今亦懷昔發聲遂成誦

送歐陽憲副

凜凜谷中風亭亭山上松風聲亦何勁松自無陵容
競秀固妍妍弱植徒豐茸獨於霜雪餘卓然見高巖
悠悠四十年所遇多尙同歐陽信佳士一節抱始終
蒼蒼歲寒質展可爲國庸適來述所職歸思何怱怱
載歌君子篇德期皓首崇

雜詩三首

洪荒一何遙悠悠幾萬載古跡竟茫然古道復安在
魏魏唐帝尊放勳薄四海文明啓中天倫典粲而蕩
魯叟刪述勞于茲立聖軌寥落但陳編撫事增歎慨
孰云天地大形勢兩睽絕一氣周流之神理有昭格
雍雍虞庭臣穆穆賢聖德大和良在茲疇咨方未徹
所以祥風儀不獨大樂闕如何此道非千古空遺跡
山龍匪舜樂卑菲真禹心大哉虞夏聖憂民同一深
既服四載勞還彈五絃琴九功亦時敘勅天尚遺音
如何精一傳載往不可尋獨有簡冊光留照猶至今

西溪魚躍爲樂安楊貢侍御題

文集卷之二

十三

西溪渺何許乃在楊林阿楊林古名族樂安世其家
家住溪水曲林木相交加地僻網罟絕溪邃遊魚多
泚泚聚弱藻洋洋戲新荷逆水微波生仰沫細雨斜
跳躍自有適出沒靜不譁楊族有名士考業咀英華
愛此魚性樂契彼道味嘉乃知天機妙萬象皆森羅
却鄙中散慢寧效濠梁誇緬懷旱麓詩載賦西溪歌
永言繼真躅勝景垂無涯

龍江曉望

兩岸青山隱隱一江白浪茫茫烟樹高低城郭風帆
遠近舟航

遣悶二首

客中鬱鬱不自得，忽思古人讀古書。古人亦知此吾懷，不放將何如。

少時都不解憂喜，壯年百慮攪我心。我心默默向誰說，呼酒只對東風斟。

臨清曲

臨清人家枕閘河，臨清賈客何其多。停舟落落無可語，呼酒只對長年歌。

題墨牛二首

文集卷之二

廿四

青松落陰石苔上，雨餘百草芊綿長。老叟牧牛牛性馴，牛背讀書興蕭爽。書中之味深且長，高睨盤首窺皇唐。日暮驅牛下山去，風清月白天茫茫。

綠楊芳草被平坡，老人騎牛行且歌。歌長扣角角微碎，悠悠古意何其多。布褐涼風生兩肘，幾度歸來月明後。夜深遺響入青雲，應有知音與携手。

蚕婦吟

采葉者誰婦，蓬首面不洗。年年絲作人家衣，短布裙穿不揜體。綺羅不是養蠶人，三復斯言情不已。

偶題

磊磊落落寒胸臆，推蕩始覺心和平。丈夫志量包宇宙。

宙細故那得風波生

憶繡榮二孫

繡孫猶未識阿翁翁在山東一馬驄
近別榮孫春又夏相應學語問阿翁

歌

贈劉余憲

古磬不諧人之耳古瑟不合人之心
茫茫天地亦大矣人生豈謂無知音
陽春白雪聽者寡巴人下里和如林
退之奇崛篇子美爛熳吟謫仙逸氣隘
六合一字價抵千兩金神遊八極不可見
獨留文字幾千卷

文集卷之二

卅五

江河萬古行地中飲者杯勺各滿願我生
其後欲追逐蹇若跛驚越紫燕良馬東西南北流覽多公取古

詞各矜衒邇來忽遇劉虛菴胸中元氣何潭潭
沉酣百子索幽恠模鑿萬象窮川嵐興來落筆亦何壯
一日千里馳風帆又若秋溟露毫末明珠大貝相錯參
始悟古人吟可學嗟我見晚生覩慙虛菴虛菴真奇
士磊落聲名固應爾相逢一曲伯牙琴高山峩峩水
清泚

茅屋漏

辛丑進士河汾客早向中州買居宅宅有茅屋八九

間補葺聊以蔽床席進士所好惟詩書衣食既足無
剩餘朝朝暮暮誦周孔行行坐坐歌唐虞以茲狂僻
誤生理老屋支撐幾星紀前月大風摧茅去今月久
雨漏不已移床徙榻那得乾堆書捲被空長嘆文章
不足補穿漏翻爲兒女生醜顏豪家大屋足懽咲已
覺紈袴輕儒冠却憶唐朝老工部西蜀草堂幾風雨
亦有官居鼎彝尊欲起樓臺無處所昔賢窮達還復
然我何愠此霑濕苦且待天晴飽讀書比屋渠渠不
須數

太行歌送丁分教之襄陵

文集卷之二

廿六

太行之山何崔嵬鐵崖翠壁萬仞中天開其勢北來
吾不知其幾萬里但見橫亘遼瀋包括秦晉斗起中
原之地何壯哉往年吾嘗陟其頂四顧山如培塿樹
如苔黃河一線遙遙下砥石奔流直到東海不復迴
此時英風浩然洒六合便欲歷覽天上金銀臺其中
羊腸九折走峻坂摧輪怪石硯礮磊落而成堆太行
之高且險也如此子今遠行令人興難裁倘到昔所
登覽竄高處爲我歌此一曲還徘徊西望襄陵迢迢
祗幾驛驅車徑須往渡清汾隈願子居易畏險慎厥
守始終永保令譽慰我相思懷

永和雙山歌

永和四境千萬山雙山之勢尤曠岷兩峯對峙若天
關中有一境通人寰南峯突兀半空裏連岫峨峨方
並起蒼松古木何蕭森朔風搜攪鳴不已北峯形狀
尤奇瑰怪石刻鏤樓與臺上有雲屏立霄漢隔礙星
斗迴風雷我來登覽值冬暮攀緣石磴到高處滄瀛
碣石覺東傾弱水崑崙在西顧俯瞰纍纍岡阜多巨
壑無底如盤渦遠近幽深杳難測寒雲冷霧紛盪
因思未闢天與地瀕洞無涯惟水氣輕陽一隙漸飄
浮大塊無邊遂凝滯渡濤蕩漾成高低剛爲金石柔

文集卷之三

廿七

土泥此山想得陽之極層巒削出天之西獨恨古來
壯遊者足跡不到茲山下遂令奇絕委幽窮無由題
品繼風雅我才雖非作者流愛此欲去還夷猶摩挲
石壁寫長句千古當與山同留

鳳凰臺歌次虛菴韻

吾聞鳳鳥不與凡禽棲隆周之時曾集豐鎬西鏘然
一鳴向人世喧啾百鳥不敢爭與啼昔有名臣黃鸞
生漢世治民之才迥與時流異穎川出守曾幾何休
風數感靈禽至靈禽文彩明山川和音噉噉聞中天
遂築高臺表神異臺空鳳去餘千年只今壞埒纔數

尺野鳥紛紛競來集簡冊空存紀瑞年荆榛不復快
觀迹我來跋馬登高丘荒塋已遠猶回頭為憶循良
心耿耿緬懷瑞物情悠悠鳳臺鳳臺重披訪往事何
須空快悵方今

聖明治理登俊良會見一朝飛去青雲上

舟中苦熱

大江千里流炎日暑氣波光互蒸濕火雲壓風空不
來舟中苦熱何太劇坐睡昏昏汗雨流對食欲餐還
復休扣舷直欲發狂叫安得少昊回清秋安得少昊
回清秋一洗煩熱情悠悠

文集卷之二

廿八

洞庭湖歌

吾觀庖犧龍馬圖五行惟水居其初自從清濁奠高
下山澤通氣無時無荆南之水亦衆矣壯觀惟有巴
陵湖世俗相傳八百里足跡未到空躊躇今秋持節
來南楚舟泊岳陽訪奇古登樓始得肆遐觀萬頃洪
濤際天宇如從東岱窺滄瀛一點仙山隔烟雨長風
歛起層霄間溟渤洶洶增狂瀾轟天揭地急雷鼓排
空炫日堆銀山浪曳風正波濤定涵泳虛空開玉鏡
金鳥飲淵千丈紅白鷗落影一行動竹客喜甚無氛
埃連翩大舸爭往來我亦飄然下樓去放舟中流何

快哉蜀江西來半天瀉瀟湘南接蒼梧野一劍橫空
有所之丈夫不作悠悠者洞庭洞庭七澤雄鄒魯昔
有觀瀾翁我今賦此良不苟乃知有本無終窮

沅州春日歌

南州二月春來早綠水青山四縈繞城中何處足春
光御史臺中富花草隄外青梅結子稀門墻桃李爭
晴輝映日紅綃正縷縷漫空白雪何霏霏芍藥錦苞
猶未啓蘭蓀露葉光泥泥楊柳風搓碧玉絲芭蕉葉
吐青鸞尾苔茵展地萱草長千紅萬紫遙相當竹林
好鳥自鳴寂菜畦蛟蝶殊悠揚生意由來滿天地粧
點池臺足佳致門清祇覺白晝長庭閑况復遊絲細
靜觀元化深無涯中心默默含春熙願効冰霜達陽
氣普期八表仁風吹

文集卷之二

廿九

